

- संसद रो बजट सत्र काल राष्ट्रपति रा अभिभाषण सागे सरु व्हेला-केन्द्रीय बजट एक फरवरी ने पेश कर्यो जावेला।
- विधानसभा रा काल सरु व्हे रह्या बजट सत्र ऊं पैली आज सत्ता पख अर विपख री रणनीतिक बैठकां व्ही।
- उपमुख्यमंत्री अर परिवहन मंत्री डॉ. प्रेमचन्द बैरवा कह्यो-सड़क सुरक्षा सरकार अर जनता री भेळी जिम्मेदारी।
- राष्ट्रपिता महात्मा गांधी री बरसी रे मौके आज वां ने सिरधा भाव सागे याद करी ज्या।
- नागौर मांय आज राज्य स्तर रो रामदेव पशु मेळो सरु व्ह्यो।

000

संसद रो बजट सत्र काल राष्ट्रपति द्रौपदी मुर्मू रा अभिभाषण सागे सरु व्हेला। सत्र रा पैला दिन वित्त मंत्री निर्मला सीतारामण आर्थिक सर्वेक्षण पेश करेला। ई पाछे एक फरवरी ने वित्त मंत्री माली साल 2025-26 रो केन्द्रीय बजट पेश करेला। संसद रा बजट सत्र रो पहलो दौर 13 फरवरी ताई चालेला। इण रो दूजो दौर 10 मार्च ऊं 4 अप्रैल ताई व्हेला। बजट सत्र ऊं पैली आज नई दिल्ली मांय सगळी पार्टियां रा नेतावां री मीटिंग व्ही। इण मांय रक्षा मंत्री राजनाथ सिंह, स्वास्थ्य मंत्री जे.पी.नड्डा, संसदीय कार्य मंत्री किरेन रिजिजू, कांग्रेस रा सांसद जयराम रमेश अर गौरव गोगोई समेत केई नेता सिरकत कीनी। मीटिंग मांय सरकार संसद रो सत्र ठीक ढंग ऊं चलावण मांय सगळी पार्टियां री मदद मांगी। मीटिंग पाछे खबरनवीसा सागे बातचीत करता थकां संसदीय कार्य मंत्री किरेन रिजिजू बतायो के काल सत्र रा पहला दिन संसद रा दोन्यू सदनां री भेळी मीटिंग व्हेला।

केन्द्रीय बजट ऊं जनता ने घणी उम्मीदां है। जयपुर रा नौजवान देवेन्द्र जैमन ने उम्मीद है के सरकार नौकरी धंधा मुहैया करावण माथे और ध्यान देवेला।

00000

मौजूदा विधानसभा रो तीजो सत्र ई काल राज्यपाल हरिभाऊ बागडे रा अभिभाषण सागे सरु व्हेला। श्री बागडे राजस्थान विधानसभा मांय पहली दफा अभिभाषण देवेला। तीन फरवरी ऊं सदन मांय राज्यपाल रा अभिभाषण माथे बहस करी जावेला, जदके सात फरवरी ने मुख्यमंत्री भजनलाल शर्मा बहस रो जवाब देवेला। विधानसभा अध्यक्ष वासुदेव देवनानी कह्यो के सदन ने 40 दिन चलावणो तय करी ज्यो है। वे बतायो के सदन रो कामकाज कागज पेन बगैर करण अर इण ने नुवी तकनीक वाळो बणावण सारु नुवा कलेवर मांय तैयार करी ज्यो है। वे बतायो के सगळा विधायकां री सीटां माथे टेबलेट लगायी ज्यो है। ई सागे ई विधानसभा रो कामकाज डिजिटल तरीका ऊं करावण लायक बणावण बाबत विधायकां ने नेवा एप्लीकेशन री सिखावण दीरीजी है। ई बीचे सत्र ऊं पैली आज मुख्यमंत्री भजन लाल शर्मा रा रहवास माथे भारतीय जनता पार्टी रा विधायक दल री मीटिंग व्ही, जिण मांय सत्र रे दौरान सरकार री रणनीति माथे चर्चा करीजी। दूजी कानी कांग्रेस रा विधायकां री मीटिंग सदन मांय विपख रा नेता टीकाराम जूली री सदरत मांय विधानसभा री नापक्ष लॉबी मांय व्ही।

00000

नॉर्वे री राजदूत मेएलिन स्टेनर आज मुख्यमंत्री भजनलाल शर्मा सागे वां रा दपतर मांय मुलाकात कीनी। ई दौरान वे प्रदेश मांय निवेश रा बारा मांय चर्चा कीनी।

000

उपमुख्यमंत्री अर परिवहन मंत्री डॉ. प्रेमचन्द बैरवा कह्यो है के सड़क सुरक्षा केवल सरकार री नहीं बल्कि सगळां री जिम्मेदारी है। वे आज जयपुर मांय राष्ट्रीय सड़क सुरक्षा माह रा राज्य स्तर रा समापन जळसा मांय बोल रह्या हा। श्री बैरवा कह्यो के सरकार सड़क हादसां री रोकथाम सारु खास कार्य योजना माथे काम कर रही है। ई सारु यातायात नियमां री पालना नी करण वाळा माथे करड़ी कार्रवाई करी जा रही है। ई सागे ई हाईवे माथे ड्राइवरां रे आराम सारु रेस्ट ऐरिया बणावण परा ई विचार कर्यो जा रह्यो है।

जळसा मांय सड़क सुरक्षा सारु समर्पण भाव सागे काम करण वाळां रो मान ई करी ज्यो।

## खबरां महाकुंभ री—

उत्तर प्रदेश सरकार प्रयागराज मांय चाल रह्या महाकुंभ रा मेला हलका रे 4 फरवरी ताई वाहन मुक्त हलको व्हेवण रो ऐलाण कीनो है। जातरूआं री हिफाजत, यातायात प्रबंधन अर मोटी तादाद मांय मौजूद जनता माथे काबू राखण रा मकसद ऊं ओ फैसलो करी ज्यो है। हालांकि जरूरी सेवावां मुहैया करावण ऊं जुडी गाड़ियां ने मेला हलका मांय जावण री मंजूरी दी जावेला। ई बीचे रेल मंत्री अश्विनी वैष्णव कह्यो है के कल दूसरे अमृत स्नान के मौके पर काल मौनी अमावस रे मौके महाकुंभ मांय आया जातरूआं रा सुबीता सारू पूरी रात रेलगाड़ियां चलायी ज्यी।

000

पंचायती राज मंत्री मदन दिलावर हर पंचायत री रोजीना साफ सफाई करण बाबत कह्यो है। वे अहलकारां ने महीना मांय चार दिन गांवां मांय रात्रि विश्राम करण रा हुकम ई दीना। दिलावर आज जयपुर मांय पंचायतीराज विभाग री समीक्षा बैठक मांय बोल रह्या हा। पंचायती राज मंत्री अहलकारां ऊं गांवां मांय साफ सफाई, प्लास्टिक काम लेवणो कम करण ऊं जुड़ी अर दूजी व्यवस्थावां रो जायजो लेवण सारू कह्यो।

000

राष्ट्रपिता महात्मा गांधी री बरसी रे मौके आज वां ने सिरधा भाव सागे याद करी ज्या। ई मौके श्रद्धाजंलि कार्यक्रम, सगळा धर्मा री प्रार्थना सभावां अर दूजा आयोजन राख्यी ज्या। प्रधानमंत्री नरेन्द्र मोदी नई दिल्ली मांय बापू री समाधि **राजघाट** माथे सिरधा रा फूल चढाया। राज्यपाल हरिभाऊ बागडे ई गांधीजी री मूरत माथे फूल चढा र वां ने याद कीना। शहीद दिवस रे मौके राजभवन अर दूजा सरकारी दफतरां मांय दो मिनट रो मौन राख र बापू ने सिरधा भाव सागे याद करी ज्या। मुख्यमंत्री भजन लाल शर्मा जयपुर मांय वां रा दफतर मांय गांधी जी री मूरत माथे फूल चढा र गांधी जी ने याद कीना। अजमेर मांय ई मौके सद्भावना यात्रा निकाळी ज्यी। कोटपूतली-बहरोड़, बांसवाड़ा, चित्तौडगढ़, झालावाड़, कोटा, पाली, बाडमेर, भरतपुर अर सवाईमाधोपुर समेत न्यारी-न्यारी ठोड़ा ऊं श्रद्धाजंलि कार्यक्रम राखण रा समाचार मिल्या है।

0000

नागौर मांय आज राज्य स्तर रो रामदेव पशु मेळो सुरू व्ह्यो। म्हाणा खबरनवीस बतायो के 12 फरवरी ताई चालण वाळा ई मेळा मांय तीन ऊं छह फरवरी ताई सांस्कृतिक कार्यक्रम ई राख्या जावेला।

000

दुनिया मांय खास ओळखाण राखण वाळो जयपुर लिटरेचर फेस्टिवल आज सुरू व्ह्यो। तीन फरवरी ताई चालण वाळा जेएलएफ रा 18वां संस्करण मांय दुनियाभर रा लेखक, विचारक अर कलाकार चर्चा करेला। ई दौरान केई सांस्कृतिक कार्यक्रम ई राख्या जावेला। पेश है एक रपट—

000

पाली जिला मांय आज मुंडारा ऊं सादड़ी ताई अनोखी बारात निकाळी ज्यी। बैलगाड़ियां मांय बैट्या बाराती पर्यावरण बचावण अर जिनावरां सागे प्रेम रो संदेश दीनो। बारात मांय शामिल जगदीश चौधरी बतायो के पर्यावरण अर जीव-जिनावरां री हिफाजत सागे ई वां रा प्रति दया भाव राखण अर सादी जिंदगी रो संदेश दियो ज्यो।

000